



ANG

Bayan

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Ispesyal na Isyu  
Nobyembre 30, 2010  
www.philippinerevolution.net

# Malawakang pakilusin ang kabataan para sa digmang bayan

Mensahe sa ika-46 na anibersaryo ng Kabataang Makabayan

Partido Komunista ng Pilipinas

Nobyembre 30, 2010

**M**arubdob na nagpupugay ang mga kadre at kasapi ng Partido Komunista ng Pilipinas, mga kumander at mandirigma ng Bagong Hukbong Bayan, at lahat ng mga organisasyon at pwersa ng National Democratic Front of the Philippines sa pagdiriwang ng ika-46 na anibersaryo ng Kabataang Makabayan (KM).


Nitong nagdaang mahigit apat at kalahating dekada, ang KM ay nagsilbing di natutuyong balon ng mga rebolusyonaryo at komunistang dumaloy sa iba't ibang mga larangan ng rebolusyonaryong pakikibaka—mula sa demokratikong kilusan ng mga kabataan at estudyante at kilusang propaganda, hanggang sa kilusang manggagawa, kilusang antipyudal at armadong rebolusyon sa kanayunan. Isa ito sa nagbuo at patuloy na nagsisilbing matibay na alyadong organisasyon ng NDFP.

Kabilang ang KM sa pinakamatitibay na katuwang sa pagsusulong ng demokratikong rebolusyong bayan sa ilalim ng pamumuno ng rebolu-

syonaryong proletaryado at sa batayan ng pagkalkaisang manggagawa at magsasaka. Isinusulong nito ang pagbubuo at pagpapalakas ng patriyotiko at progresibong alyansa laban sa imperyalismo at mga lokal na kaalyado nitong malalaking komprador burgesya at panginoong maylupa. Sa praktika, ang KM ang siyang nagsisilbing Liga ng mga Kabataang Komunista.

Sa pagdiriwang ng anibersaryo ng pagtatatag nito, makabubuti sa KM na masusing pag-aralan ang panawagan ng Komite Sentral ng PKP para sa

pagsusulong ng digmang bayan tungo sa yugto ng estratehikong pagkapatas sa sunod na limang taon. Sa harap ng ibayong pagsidhi ng krisis ng pandaigdigang sistemang kapitalista at lokal na naghaharing sistemang malakolonyal at malapyudal, at sa kabila ng matinding pandarahas at pagpapahirap na idinulot ng Oplan Bantay Laya sa mga rebolusyonaryong pwersa at mamamayan, patuloy na lumawak at lumakas ang mga rebolusyonaryong pwersa nitong nagda-



ang dekada. Nasa katayuan sila ngayon para kamtin ang malalaking pagsikad sa darating na mga taon at iabante ang digmang bayan sa susunod na estratehikong yugto.

Gagampan ang KM at ang malawak na militanteng kilusan ng mga kabataan ng mahalagang papel sa mga rebolusyonaryong pagsulong sa susunod na limang taon, tulad ng ginampanan nito sa unang yugto ng pambansang paglawak ng rebolusyonaryong kilusan noong dekada 1970. Ang pag-abante ng digmang bayan tungo sa kalitibong mas mataas na yugto nito ay mahigpit na nakasalalay sa ibayong pagsigla at paglawak ng kilusang masa at martsa ng milyun-milyong mamamayan sa landas ng militante at rebolusyonaryong pakikibaka. Libu-libong bagong kasapi ng Partido, laksa-laksang Pulang mandirigma at daan-daan libong aktibista sa kalunsuran at kanayunan

ang dapat mapalitaw sa mga darating na panahon para sa ibayong pagpapasiglang ito ng kilusang masa.

Ang ilang ulit na pagpapasigla at paglawak ng KM at ng rebolusyonaryong kilusan ng kabataan ay gagampan ng malaking bahagi sa pangkalahatang pagsulong ng rebolusyonaryong kilusang masa. Ang masiglang mga pagkilos at pakikibaka ng mulat na mga kabataan sa loob at labas ng kanilang mga paaralan at ang pagwagayway ng bandila ng rebolusyong pangkultura at ikalawang kilusang propaganda ay nagsisilbing batingaw na nananawagan sa mamamayan at buong bansa na bumangon at lumaban sa pagkagapos, pang-aapi, panunupil at pagpapahirap. Ang pinakasukat ng pagkarebolusyonaryo ng kilusang kabataan at estudyante ay ang higpit ng pakikipagkaisa at lalim ng pagkakaugat nito sa mga pakikibaka at pagkilos ng aping mamamayan.

Upang maisagawa ang malawakang pagpapakilos sa hanay ng kabataan, kagyat na hinaharap ng KM at ng mga progresibong organisasyon ang mga pang-araw-araw na suliranin ng kabataan at mga estudyante. Sa batayan ng kanilang mga demokratikong interes, mabubuo ang iba't ibang antas ng pagkakaisa ng kabataan at mga estudyante at mahihikayat ang iba't ibang antas at anyo ng pagpapahayag at pagkilos. Responsibilidad ng mga progresibo at demokratikong pwersa na itaas ang antas ng kamulatan ng kabataan sa pamamagitan ng paghahapag ng matalas na pagsu-



suri sa mga usaping ito, at pagsasakonteksto nito sa mga saligang suliraning panlipunan. Dapat ilantad ang ugat ng mga ito sa antinasyunal, anti-demokratiko at anti-mamamayang katangian ng naghaharing estado at kabulukan ng umiiral na sistemang panlipunan.

Mahusay na halimbawa ang naging mga pagkilos ng mga kabataan, estudyante at maging ng mga guro, administrador at empleyado sa iba't ibang kampus at syudad nitong mga nagdaang linggo laban sa pagkaltas sa badyet ng gubyrno sa mga pampublikong kolehiyo at unibersidad. Mula rito ay maaaring mabuo ang mas malawak pang pagkakaisa ng mga estudyante at kabataan na sasaklaw pati sa mga pribadong paaralan sa batayan ng komun na interes laban sa komersyalisasyon ng edukasyon, ibayong pribatisasyon ng sistemang edukasyon at



Ispesyal na Isyu Nobyembre 30, 2010

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

[www.philippinerevolution.net](http://www.philippinerevolution.net)

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: [angbayan@yahoo.com](mailto:angbayan@yahoo.com)

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

kasalatan ng suporta ng papet na reaksyunaryong gubyrerno sa edukasyon sa kalahatan. Ibayo pang pakikipagkaisa sa mas malawak na mamamayan ang maaaring mabuo sa batayan ng komun na interes laban sa pagkaltas at pagkakait na ginawa ng rehimeng US-Aquino sa mga lubhang kinakailangang gastusing panlipunan ng estado, at para sa panawagang baguhin ang mga tagibang na prayoridad ng gubyrerno.

Ang mga pagkilos ng kabataan at mga estudyante sa loob ng paaralan at mga lansangan ay dapat isagawa sa pagsusulong ng kanilang mga pakikibaka. Ang mga pagkilos na ito ay ilang ulit pang mapalalakas sa pakikipagkaisa sa iba't ibang demokratikong sektor sa pamamagitan ng maramihang pagpa-



pakilos ng mga kabataan at estudyante tungo sa mga pabrika at komunidad ng mga manggagawa at maralita ng lunsod, at maging sa kanayunan upang ihapag sa mamamayan ang kanilang hinaing; alamin ang mga hinaing at pakikibaka ng magsang anakpawis; at magsuportahan sa pakikibaka ng isa't isa at magkaisa sa komun na pakikibaka ng sambayanan.

Sa paglahok ng mga kabataan at estudyante sa malawakang mga pakikibakang masa, tumaas ang kanilang kamulatan sa mga saligang usaping pangkaysaysayan at panlipunan, at nagiging higit na epektibong propagandista at organisador di lamang sa sariling hanay kundi sa hanay ng malawak pang masa ng sambayanan. Sa pagmumulat, pag-oorganisa at pagpapakilos ng KM sa pinakamalawak na bilang ng kabataan at mga estudyante at paglubog nila sa pakikibaka ng iba pang mga demokratiko at aping sektor, nakatutulong sila sa mabilis na pagabante ng pambansa-demokratikong pakikibaka sa kabuuan.

Kailangang maabot ng KM ang signipikanteng paglawak kaakibat ng kalitatibong pagsigla ng kilusan at mga pakikibaka ng kabataan at estudyante. Sa gayon, epektibong matutugunan ng KM ang bahagi nito sa pangkalahatang target ng pagsusulong ng digmang bayan sa susunod na limang taon.

Dapat magkaroon ng buwanang target ng pagpapalawak ang mga balangay ng KM upang abutin ang kalitatibong paglawak kada kwarto at kada semestre sa susunod na mga taon. Da-

pat buuin ang pangkalahatan at partikular na plano at mga taktika sa pagpapalawak. Buuin ang angkop na mga komite na mangangasiwa sa rekrutment. Bawat isang kasapi ay dapat may target at bigyan ng kakayahang sa pagrerekrut. Bigyangpansin ang pag-oorganisa ng KM at mga progresibong organisasyon ng mga kabataan sa mga komunidad at pabrika.

Dapat tiyakin na ang mga bagong rekrut ay nabibigyan kaagad ng maikling kursong sektoral at pangkalahatang pambansa-demokratikong edukasyon. Tiyakin na masundan ito kaagad ng pag-aaral hinggil sa lipunan at rebolusyong Pilipino. Pasiglahin ang ganitong mga pag-aaral gamit ang mga bago at mauunlad na pamamaraan tulad ng mga bidyo at mga presentasyong gamit ang mga kompyuter, *cellphone* at iba pa. Palaganapin sa *internet* ang lahat ng materyales pang-edukasyon. Dapat ay mabilis din silang sinasanay sa pagrerekrut, pagpapakilos at pagpopropaganda sa mga bagong kasapi.

Ang pagpapasigla ng rekrutment at paglawak ng kilusan ay nakasalalay nang malaki sa pagpapapasigla ng ating rebolusyonaryong propaganda. Dapat tiyakin ng KM na nakapagpapahayag at natatalakay nito nang malalim ang mga tampok na isyu sa loob at labas ng kampus. Ipaabot ang rebolusyonaryong paninindigan sa malawak na hanay ng kabataan at estudyante, manggagawa, maralita ng lunsod, magsasaka at ibang demokratikong sektor, at sa buong bansa. Pagplanuhan ang pagpa-

palaganap ng ating mga rebolusyonaryong pahayagan, pangunahin na ang pahayagang *Ang Bayan* at iba pang mga rebolusyonaryong lathalian at pahayag. Sikaping mapadaloy at mapalaganap din ang ating rebolusyonaryong propaganda sa mga pahayagang pangkampus.

Sa isinusulong ngayon ng rebolusyonaryong kilusan na pag-igpaw ng digmang bayan sa sunod na limang taon, nabibigyang-diin ang pangangailangang magpalitaw ng daan-daan libong kabataang handang maglingkod sa interes ng sam-

ayanan at magsilbi sa iba't ibang larangan ng rebolusyonaryong pakikibaka. Nasa katayuan ngayon ang KM at ang rebolusyonaryong kilusang kabataan na higitan pa ang naiambag nito noong Sigwa ng Unang Kwarto ng 1970 at sa unang yugto ng pagsulong ng rebolusyong Pilipino.

Kailangang-kailangan ang napakaraming kabataan para tumulong sa pagsusulong ng iba't ibang gawain sa kilusang mangagawa, kilusang magsasaka at iba't ibang mga demokratikong sektor. Kailangang-kailangan ng

laksa-laksang kabataang handang pumaloob sa iba't ibang yunit ng Bagong Hukbong Bayan at mag-ambag ng kanilang lakas at talino sa pagtupad ng papalaki at paparaming mga tungkulin sa pagsusulong ng armadong pakikibaka. Higit sa lahat, kailangan ng libu-libong kabataan upang maging kasapi at kadre ng PKP upang patuloy na magkaroon ng sariwang dugo at maging masigla ang ating Partido.

Ang pagdiriwang ng KM sa anibersaryo nito ngayong taon ay isinasagawa kasabay ng pagdiriwang ng PKP at ng buong pambansa-demokratikong rebolusyonaryong kilusan sa ika-40 anibersaryo ng librong *Lipunan at Rebolusyong Pilipino* na inilimbag ng Palimbagang Sentral ng Komite Sentral ng PKP noong 1970. Gamitin natin ang okasyong ito para pasiglahin ang pag-aaral ng LRP at Marxismo-Leninismo-Maoismo bilang gabay sa ibayong pagpapasigla ng ating mga rebolusyonaryong gawain.

Mabuhay ang Kabataang Makabayan!

Mabuhay ang Partido Komunista ng Pilipinas!

Mabuhay ang Bagong Hukbong Bayan!

Mabuhay ang National Democratic Front of the Philippines!

Isulong ang digmang bayan!

AB

